

## **Tujuh kes Covid-19 baru, tidak ada penularan rakyat tempatan**

**Malaysiakini**

**09 Jun 2020**

Malaysia hari ini mencatatkan tujuh lagi kes Covid-19 baru. Daripada jumlah itu, enam adalah kes import yang mendapat jangkitan di luar negara manakala satu lagi adalah kes penularan tempatan.

Penularan tempatan itu melibatkan seorang warga asing iaitu kes saringan semasa mula berkerja. Ini menjadikan jumlah kes positif Covid-19 di Malaysia setakat hari ini adalah 8,336 kes.

“Sukacita dimaklumkan bahawa pada hari ini, tiada kes penularan dalam negara dicatatkan di kalangan warganegara Malaysia,” kata Ketua Pengarah Kesihatan, Dr Noor Hisham Abdullah pada sidang medianya, di Putrajaya, hari ini.

Ini dianggap satu kejayaan buat Kementerian Kesihatan kerana tidak ada penularan yang membabitkan rakyat Malaysia sejak perintah kawalan pergerakan (PKP) bermula pada 18 Mac.

Dr Noor Hisham juga melaporkan jumlah pemulihan Covid-19 tertinggi dalam sehari dengan 281 pesakit dibenarkan pulang.

“Ini merupakan jumlah discaj tertinggi yang pernah dicatat setakat ini.

“Jumlah kumulatif kes yang telah pulih sepenuhnya dari Covid-19 dan telah discaj daripada wad adalah sebanyak 6,975 kes atau 83.7 peratus daripada jumlah keseluruhan kes,” katanya.

Oleh itu, katanya, jumlah kes aktif dengan keboleangkitan Covid-19 adalah 1,244 kes dan mereka telah diasingkan dan diberi rawatan.

Beliau berkata, sehingga kini, sebanyak enam kes positif Covid-19 sedang dirawat di Unit Rawatan Rapi (ICU) dan daripada jumlah tersebut, hanya satu kes yang memerlukan bantuan pernafasan.

“Adalah dimaklumkan bahawa tiada pertambahan kes kematian dilaporkan pada hari ini.

“Justeru, jumlah kumulatif kes kematian di Malaysia adalah kekal sebanyak 117 kes atau 1.4 peratus daripada jumlah keseluruhan kes,” katanya.

**Copyright © 1999-2012 Mkini Dotcom Sdn. Bhd**

Source: <https://www.malaysiakini.com/news/529462>